



Ah! Mpira!

Stella Kihweo
Onesmus Kakungi



Mimi ninapenda
kucheza na rafiki
yangu Chuma.




Mimi na Chuma
tunapendana
sana.

Tukitumwa,
tunaenda pamoja.




Siku moja
nilitumwa na bibi
dukani nikanunue
chumvi na mafuta.

Nilienda na
Chuma.




Tukiwa njiani,
tuliwaona watoto
wenzetu wakicheza
mpira wa miguu.




Mimi nilitamani
sana kucheza
mpira huo.


Nilisema, "Ah!
Mpira!"



Nilimwambia
Chuma, “Twende
tuwaombe kucheza
nao mpira. Mimi
hupenda mpira wa
miguu.”



Chuma alinijibu,
“Twende kwanza
dukani, halafu
turudi kucheza.”



Lakini nilimwambia
Chuma, "Tucheze
kwanza wewe!
Tukienda
nyumbani bibi
hataturuhusu."



Tulikubaliwa na
wenzetu tukacheza
mpira.

Nilikuwa golikipa.



Nilijitahidi kudaka
mpira.

Wenzangu
hawakuweza
kufunga goli hata
moja.




Uwanja tuliochezea
ulikuwa na
mchanga mwingi.

Magoli yake
yalikuwa mawe
makubwa.



Baada ya mchezo, tuliondoka kwenda dukani, lakini hatukuwa na pesa. Nilianza kulia.

Chuma alinikemea, "Acha kulia. Ni wewe ulitaka tucheze kabla ya kwenda dukani."



Tulirudi nyumbani
bila chumvi wala
mafuta.

Tulikuwa
tumechafuka kweli
kweli.




Tulimkuta bibi
amekasirika mno.

Alituuliza,
“Mmekuwa wapi
muda huu wote?”



Alipogundua kuwa
tulipoteza hela,
alisema,
“Nawasamehe leo,
lakini, msirudie
tena kucheza bila
ruhusa.”



Tulienda haraka
kuwalisha kuku na
bata.

Baadaye, tulioga
na kuwa wasafi.

Ah! Mpira!

Author - Stella Kihweo

Illustration - Onesmus Kakungi

Language - Kiswahili

Level - First sentences

© African Storybook Initiative, 2015

Creative Commons: Attribution 4.0

Source www.africanstorybook.org